

之惡鬼得其便隨逐因衰疾之適得疾病恐怖猶豫自念言我初事佛云何故復疾病耶不能自信呼使巫媚之師卜問解除鎮厭無益遂便禱賽邪神衆過遂增妖魅惡鬼屯守其門遂便喪衰死亡不離門戶財產衰耗家室病疾更相注續不離牀席命終牽墮泥犁中當被考治謫罰無有歲數是人但坐不能專一志意猶豫無所專據不信佛法故得其罪凶衰如是世間人不知佛法者謂呼事佛令得殃衰不知其人行自不正違犯佛經戒

心意衆態具足身自招之無有與者阿難聞之便更頭腦著地爲佛作禮

慢法經

阿難分別經

乞伏秦沙門聖堅譯

阿難白佛言有人事佛得富貴諧利者有衰耗不偶者云何不等耶願天中天普爲說之佛告阿難有人奉佛從明師受戒專信不犯

精進奉行不失所受形像鮮明朝暮禮拜恭敬然燈淨施所安不違道禁齋戒不厭中心欣欣常爲諸天善神擁護所向諧偶百事增倍爲天龍鬼神衆人所敬後必得佛是爲善男子善女人眞佛弟子也變一有人事佛不值善師不見經教受戒而已示有戒名憤塞不信違犯戒律乍信不信心意猶豫亦無經像既不日日燒香作禮恒懷瞋恚惡口罵詈又不六齋殺生趣手不敬佛經持著衣被弊篋之中或著妻子牀上或以掛壁無有座席供養

之心與世間凡書無異若疾病者狐疑不信便呼巫師卜問解奏祠祀邪神天神離遠不得善護妖魅日進惡鬼屯門令之衰耗所向不諧現世罪人非佛弟子死當入泥犂中被拷治掠由其罪故現自衰耗後復受殃死冤神痛酷不可言愚人盲盲不思宿命先世因緣精神所之根本從來謂言事佛致是衰耗不慚前世宿行不功責聖咎天世人迷謬不達乃爾不達之人狐疑猶豫信不堅固心懷不定進退失理違負佛恩而無返覆遂爲三

塗所見綴縛自作禍福罪識之緣種之得本
不可不慎十惡怨家十善良友安神得道皆
從善生善爲大鎧不畏刀兵有能守信室內
和安福付自然非神授與也今復不信者後
生轉復劇矣佛言阿難善惡追人如影逐形
不可得離罪福之事亦皆如是勿作狐疑自
墮惡道諦信不違所在常安佛語至誠終不
欺人佛復告阿難佛無二言經法難聞汝宿
有福今得侍佛當念報恩頒宣法教示現人
民爲作福田信者得值後生無憂阿難受教

奉行普聞阿難復白佛言人不自手殺教人
殺者不自手殺爲無罪耶佛言阿難教人殺
者重於自殺何以故或是奴婢愚小下人不
知罪法或爲縣官逼爲所使不自出意雖獲
其罪事意不同輕重有差教人殺者知而故
犯陰懷逆害愚惡趣手無有慈心欺罔三尊
亦負自然犯五逆罪害生杭命其罪莫大怨
對相報世世受殃展轉相償無有斷絕現世
不安數逢災凶死入地獄出離人形當墮畜
生中爲人屠截三塗八難巨億萬劫以肉供

人未有竟時令身困苦噉草食泉今世現有
是輩畜獸皆由前世得爲人時暴逆無道陰
害傷生不信致此世世爲怨還相報償神同
形異罪深如是阿難復白佛言世間人及佛
弟子惡意向師及道德之人其罪云何佛語
阿難夫爲人者當愛樂人善以善爲友不可
嫉之人有惡意向有德之人及善師者是惡
意向佛無異也寧持萬石弩還自射身佛語
阿難言自射身爲痛不阿難言甚痛甚痛世
尊佛言人持惡意向道德人及其師者痛劇

弩射身也爲人弟子不可輕慢其師惡意向
道德人視之如佛不可嫉其善也人有戒德
者感動諸天天龍鬼神莫不敬尊寧投身火
中利刀割肉慎莫嫉妬人之善也其罪不小
慎之慎之阿難言師者爲可灼然非弟子不
以變一小罪成大可無罪不佛言不可示甚深甚
深師弟之義義感自然當相訊厚視彼如己
己所不欲勿施於人弘崇禮律不使怨訟弟
子亦爾二義真誠師當如師弟子當如弟子
勿相誹謗慎莫含毒小怨成大還自燒身我

觀末世諸惡人輩魔世比丘但念他惡不自止惡嫉賢妬善不念行道既不能爲復壞毀人斷絕道意令不得行貪務俗業積財自喪死墮惡罪大泥犁中未當如是於世何求念報佛恩相率以道道不可不學濟神離苦超出生死見賢勿慢見善勿謗勿以小過證人大罪違法失理其罪莫大罪福有證可不慎耶阿難復白佛言末世弟子理家因緣隨事便宜當云何佛言受佛禁戒信而奉行不念誑妄奉孝畏慎敬歸三尊養親盡忠可得爲

世間事不可得爲世間意也阿難言世間事世間意云何耶天中天佛言爲佛弟子可得販利業平斗直尺不罔人民施行合理不違神明自然之理葬送移徙姻娶之事是爲世間事也世間意者爲佛弟子不得卜問請祟符呪厭懾祠祀解奏亦不得擇良時良日受佛五戒者福德人也有所施作當啓三尊道護爲強役使諸天天龍鬼神無不敬伏戒貴則尊無往不吉豈有忌諱不善者耶不達之人自作罣礙善惡之事自由心作禍福由人

如影追形響之應聲戒行之德應之自然諸
天所護願不違意感動十方與天叅德功勲
巍巍衆聖嗟歎難可稱量智能達命沒身不
邪善如佛教可得度世之道阿難聞佛說更
整袈裟頭腦著地唯然世尊我等有福得值
如來普恩慈大愍念一切爲作福田令得脫
苦佛言至真而信者少是世多惡衆生相詛
甚可痛哉若有信者若一若兩奈何世惡乃
弊如是佛滅度後經法稍替漸衰滅矣嗚呼
痛哉將何恃怙阿難墮淚因事說曰

佛爲三界護 恩廣大慈普 世弊不見佛
值法者亦難 痛矣不識者 盲盲不別真
痛矣乃如斯 罪使令如是 宿福值法者
若一若有兩 經教稍稍沒 當復何恃怙
佛恩非不大 罪由衆生故 法鼓震三千
如何不得聞 世濁多惡人 倒見墮顛倒
諛諂譁訛聖 邪魅相毀壞 不信世有佛
言佛非大道 是人是非人 自作衆罪本
命盡往無擇 刀劍解身形 食鬼好代殺
鑊湯涌其中 姪洩抱銅柱 大火相燒然

誹謗清高士	鐵鉤拔其舌	亂酒無禮節
迷惑失人道	死入地獄中	洋銅沃其口
遭逢衆危難	毒痛不可言	若生還爲人
下賤貧窮中	不殺得長壽	無病常康強
不盜後大富	錢財恒自饒	不姪香清淨
身體鮮苾芬	光影常奕奕	上則爲天王
至誠不欺詐	爲衆所奉承	不解後明了
德慧所尊敬	五福超法出	天人同儔類
所生億萬倍	真諦甚分明	末世諸惡人
不信多狐疑	癡愚不別道	罪深便逮冥

殺聖毀正覺	死入大鐵城	神識處其中
頭上戴鐵輪	求死不得死	須臾已變形
矛戟相貫刺	軀體恒殘截	奈何世如是
背正信鬼神	解奏好卜問	祭祀傷不仁
死墜十八獄	經歷黑繩獄	八難爲界首
得復人身難	若時得爲人	蠻狄無義理
癡騃無孔竅	跛躄瘂不語	朦朧不達事
惡惡相牽拘	展轉衆徒聚	禽獸六畜形
爲人所割屠	剥皮視其喉	歸償宿怨對
以肉給還人	無道墮惡道	求脫甚爲難

人多既難得 佛經難得聞 世尊爲衆祐
三界之特尊 敷遺甘露法 令人普奉行
哀哉已得慧 愍念羣萌故 開語示導真
黠者即度苦 福人在向向 見諦學不生
自歸大護田 種種不死地 恩慈莫過是
世祐轉法輪 願使一切人 得服甘露漿
慧船到彼岸 法磬聞三千 彼我無有二
願發無上真
阿難說如是諸會大衆信解僧那大鎧甘露
之音香熏三千從是得度開現道地爲作橋

梁國王臣民天龍鬼神聞經所說阿難所說
且悲且喜誓首佛足及禮阿難受教而去

阿難分別經

五母子經

慶一

十

吳 優 婆 塞 支 謙 譯

昔者有阿羅漢在山中奉行道禁有一小兒
年始七歲大好道棄家去作沙門隨師在山
中從師學法精進不懈年八歲便得四通一